

Pisortat Pisiortortarneranni Neqerooruteqartitsinermi Maalaaruteqartarfik pillugu Inatsisartut inatsisaat nr. 7, 12. juni 2019-imeersoq

Atuuffissaa

§ 1. Pisortat Pisiortortarneranni Neqerooruteqartitsinermi Maalaaruteqartarfik pisortani oqartussat aamma sullissiviit nioqputissanik aamma kiffartuussissutinik pisiniarnerannut atatillugu neqerooruteqartitsisarneq pillugu inatsisartut inatsisaanni kiisalu sanaartornermi neqerooruteqartitsisarneq pillugu inatsisartut inatsisaanni aalajangersakkanik unioqputitsineq pillugu naammagittaalliutinik suliaqassaaq.

Imm. 2. Inatsisartut inatsisaanni imaluunniit Inatsisartut inatsisaat naapertorlugu Pisortat Pisiortortarneranni Neqerooruteqartitsinermi Maalaaruteqartarfimmut naammagittaalliorsinnaaneq pillugu aalajangersakkanik aalajangersaasoqarsimappat, inatsit aammattaaq atuutissaaq.

Pisortat Pisiortortarneranni Neqerooruteqartitsinermi Maalaaruteqartarfiup aaqqissuussaanera

§ 2. Pisortat Pisiortortarneranni Neqerooruteqartitsinermi Maalaaruteqartarfiup inuttarissavai siulittaasoq ilaasortallu sulianik ilisimasallit ikinnerpaamik marluk.

Imm. 2. Siulittaasoq aamma ilaasortat ukiut sisamat tikillugit atuuttussatut toqqarneqassapput.

Imm. 3. Ilaasortat tamarmik immikkut sinniisussaannik 1-imik amerlanerusunilluunniit ilaasortaasup pisinnaanginnerani peqataasussamik toqqaasoqassaaq.

Imm. 4. Siulittaasoq, inatsisilerituutut soraarummeersimasoq, Kalaallit Nunaanni Eqqartuussisuunermit toqqarneqassaaq. Ilaasortat sulianik ilisimasallit Kalaallit Nunaanni pisortani suliaqartuusut inuussutissarsiornermilu attuumassutilinnit, inuit pisortat pisiortortarnerannik imaluunniit inatsisilerinermik ilisimasallit akornanni innersuussinerit naapertorlugit Naalakkersuisunit toqqarneqassapput.

Imm. 5. Siulittaasoq aamma ilaasortat sulianik ilisimasallit naammagittaalliuteqartarfimmi sulinerminni arlaannaannulluunniit attuumassuteqanngitsumik atuutissapput.

Imm. 6. Siulittaasoq ilaasortallu sulianik ilisimasallit toqqaqqinneqarsinnaapput.

Imm. 7. Inatsisartunut Naalakkersuisunullu il.il. ilaasortat aningaasarsiaqartitaanerat il.il. pillugit Inatsisartut inatsisaat naapertorlugu maalaaruteqartarfiup ilaasortaasa aningaasarsiaqartinneqarnissaat pillugu Naalakkersuisut malittarisassaliussapput.

§ 3. Pisortat Pisiortortarneranni Neqerooruteqartitsinermi Maalaaruteqartarfik allattoqarfeqarpoq, maalaaruteqartarfiup suliaqarnerani ikiuuttussamik.

Imm. 2. Inatsisartut inatsisaanni matumani aalajangersakkat eqqarsaatigalugit maalaaruteqartarfiup suleriaasissai siulittaasup aalajangersassavai.

Naammagittaalliuuteqarsinnaatitaasut

§ 4. Pisortat Pisiortortarneranni Neqerooruteqartitsinermi Maalaaruteqartarfimmut naammagittaalliuuteqarsinnaasut tassaapput:

- 1) Kinaluunniit inatsisit tunngavigalugit annertuumik tamatumunnga soqutiginnittoq.
- 2) Kattuffiit aamma pisortani oqartussat Naalackersuisunit naammagittaalliorsinnaatinneqartut.

Imm. 2. Maalaaruteqartarfiup inuk alla suliamut annertuumik pingaaruteqartoq naammagittaalliuuteqarfigineqartoq naammagittaalliorluunniit sinnerlugit suliamut peqataatinneqarnissaa akuerisinnaavaa.

Naammagittaalliummik tunniussineq

§ 5. Naammagittaalliuut suliamut tunngatillugu ilanngussartalik suliakkiuteqartup naammagittaalliuutaata inerniliiffigineqarnerata aalajangiiffigineqarnerataluunniit kingorna kingusinnerpaamik sapaatit akunneri sisamat qaangiutsinnagit allaganngorlugu Pisortat Pisiortortarneranni Neqerooruteqartitsinermi Maalaaruteqartarfimmut tunniunneqassaaq.

Imm. 2. Kingusinnerpaamik naammagittaalliuutip maalaaruteqartarfimmut tunniunneqarneranut peqatigitillugu naammagittaalliuuteqartup suliakkiussutini pillugu naammagittaalliuuteqarfigineqartumut allaganngorlugu nalunaarutigissavaa. Naammagittaalliuut naammagittaalliuuteqartup naammagittaalliuuteqarfigineqartumut nalunaarutaata assilineranik ilaqartinneqassaaq.

Imm. 3. Naammagittaalliuutigineqartoq suliassap suliarineqarnissaanut tunngavissiinnagipat maalaaruteqartarfiup naammagittaalliuut aalajangiinnermigut itigartissinnaavaa, tamanna naammagittaalliuuteqartumut naammagittaalliuuteqarfigineqartumullu nalunaarutigineqassalluni.

Imm. 4. Pisortat oqartussaaffigisaanni suliffeqarfiinilu nioqqutissanik kiffartuussinernillu pisinermut tunngatillugu neqerooruteqartitsisarneq pillugu inatsisartut inatsisaat naapertorlugu naammagittaalliummik tunniussinermi naammagittaalliuuteqartoq naammagittaalliuuteqarnermut akitsuummik kr. 10.000-inik akiliuteqassaaq.

Imm. 5. Sanaartornermi neqerooruteqartitsisarneq pillugu inatsisartut inatsisaat malillugu naammagittaalliummik tunniussinermi, naammagittaalliorloq sanaartugassanut akigititassap 1 procentiatut ilusilimmik naammagittaalliuuteqarnermut akitsuummik akiliissaaq, taamaattoq annerpaamik kr. 100.000-inik.

Imm. 6. Imm. 3 malillugu naammagittaalliuut itigartitsissutigineqarpat, imm. 4 aamma 5 malillugit naammagittaalliuuteqarnermut akitsuut akiliutigineqartoq utertinneqassaaq.

Imm. 7. Naammagittaalliuuteqarnermut akitsuut akiliutissaaq akilerneqartinnagu maalaaruteqartarfiup naammagittaalliuut suliaralugu aallartissanngilaa. Naammagittaalliuutip tunniunneqarneranit kingusinnerpaamik sapaatip akunneri sisamat qaangiuppata naammagittaalliuuteqarnermut akitsuut akilerneqarsimannagipat naammagittaalliuut atorunnaartutut isigineqassaaq.

Imm. 8. Naammagittaalliorloq naammagittaalliornermini tamakkiisumik ilaannakuusumilluunniit taparserneqarpat, imm. 4 aamma 5 malillugit naammagittaalliuuteqarnermut akitsuut utertinneqassanersoq, pillugu maleruagassanik erseqqinnerusunik Naalackersuisut aalajangersaasinnaapput.

§ 6. Pisortat Pisiortortarneranni Neqerooruteqartitsinermi Maalaaruteqartarfiup naammagittaalliuuteqarfigineqartoq qinnuigissavaa suliami pisut inatsisitigullu pissutsit pillugit nassuiaammik tunniusseqqullugu kiisalu naammagittaalliuuteqartarfiup piffissaliussaa nallertinnagu suliambut tunngatillugu uppersaatinik nassiusseqqullugu.

Imm. 2. Maalaaruteqartarfiup § 4, imm. 2 naapertorlugu naammagittaalliuuteqartoq, naammagittaalliuuteqarfigineqartoq inulluunniit alla qinnuigisinnaavai paasisutissanik suliap naliliiffigineqarnissaanut pisariaqartutut naliliiffigineqartunik maalaaruteqartarfiup piffissaliussaa nallertinnagu pissarseqqullugit.

§ 7. Naammagittaalliuuteqartoq suliamalla peqataatinneqalersimasooq, taamaattoqarpat, nassuiaammik § 6, imm. 1-imi taaneqartumik allagaatinillu suliambut tunngasunik maalaaruteqartarfimmit ilisimatinneqassapput, tassa tunniussineq inatsisinut allanut akerliunngippat.

Imm. 2. Siulittaasup sulianut ataasiakkaanut tunngatillugu aalajangersinnaavaa allaganngorlugu ilanngussanik allanik paarlaasseqatigiittoqassasoq.

§ 8. Suliassaq allaganngorlugu ilanngussanik paarlaasseqatigiinnikkut piareersarneqassaaq tamannalu tunngavigalugu aalajangiiffigineqarluni, tassa oqaasiinnartigut isumaqatiginninni-artoqarnissaa siulittaasup aalajangersimannippagu.

Imm. 2. Naammagittaalliuuteqartoq, naammagittaalliuuteqarfigineqartoq suliamalla peqataatinneqalersooq eqqartuussissuserisumik, kukkunersiuisumik allamilluunniit suliambut tunngatillugu ilisimasalimmik sinniisoqarnissamut pisinnaatitaavoq. Siulittaasup kaammattuutigisinnaavaa naammagittaalliuuteqartoq naammagittaalliuuteqarfigineqartoq suliamalla peqataatinneqalersooq naammagittaalliuuteqartup siuliani allassimasutut sinniisoqarnissaa.

Imm. 3. Oqaasiinnartigut isumaqatiginninniarnert tamanut ammasuunngillat. Pissutsilli immikkut ittut atuutsillugit siulittaasup aalajangersinnaavaa tamanut ammatitsinissaq.

Suliap aalajangiiffigineqarnera aamma suliambut aningaasartuutit

§ 9. Pisortat Pisiortortarneranni Neqerooruteqartitsinermi Maalaaruteqartarfiup illuatungeriinni aappaasooq tapersersornerusinnaangilaa pineqartup piumasaaqatai sipporlugit aamma illuatungeriinni pineqartup pissutsit atuutsinniannisai eqqarsaatigissanagit.

§ 10. Pisortat Pisiortortarneranni Neqerooruteqartitsinermi Maalaaruteqartarfimmi sulianik aalajangiinermi siulittaasooq ikinnerpaamillu ilaasortat paasisimasallit 2 peqataassapput. Maalaaruteqartarfimmi aalajangigassat nalinginnaasumik amerlanerussuteqartoqarneratigut aalajangiiffigineqartassapput. Taasisut naligiippata siulittaasup taasinera aalajangiisuussaaq.

Imm. 2. Siulittaasup ilaasortanik sulianik ilisimasalinnik peqataasooqanngikkaluartoq suliani periaatsimut tunngaviunngitsumik pissuseqartuni aamma suliap ingerlaneranut tunngasut aalajangiiffigisinnaavai.

Imm. 3. Aalajangiineq tunngavilersorneqassaaq aamma naammagittaalliuuteqartumut, naammagittaalliuuteqarfigineqartumut suliamullu peqataatinneqalersimasumut nassiunneqarluni. Aalajangiineq isumaqatigiilluni pisimangippat aalajangiineq isummernermik aalajangiinermut tunngavissiiingitsumik imaqassaaq.

Imm. 4. Maalaaruteqartarfiup aalajangersinnaavaa naammagittaalliuuteqartup suliamut aningaasartuutai tamakkiisumik ilaannakortumilluunniit illuatungeriinni ajorsartup akilissagai, taamaattoq tak. imm. 5 aamma 6.

Imm. 5. Imm. 4 malillugu suliamut aningaasartuutit annerpaamik 75.000 kr.-ussapput, taamaattoq tak. imm. 6.

Imm. 6. Maalaaruteqartarfiup naammagittaalliuuteqartup suliamut aningaasartuutaanik naammagittaalliuuteqarfigineqartoq akileeqqussappagu maalaaruteqartarfiup pissutsit immikkut ittut pissutissaqartippassuk imm. 5-imi aningaasat annertunerpaaffissaat avaqqussinnaavai.

§ 11. Pisortat Pisiortortarneranni Neqerooruteqartitsinermi Maalaaruteqartarfimmit aalajangiussinerit maalaaruteqartarfiup nittartagaatigut tamanut saqqummiunneqassapput.

Imm. 2. Maalaaruteqartarfiup ukiumoortumik nalunaarutaa aalajangikkanik imalik ukiut tamaasa maalaaruteqartarfiup nittartagaatigut saqqummiunneqassapput.

Iliuseqarnissamut kinguneqartitsinissamullu periarfissat

§ 12. Pissutsit immikkut ittut pissutissaqartippassuk Pisortat Pisiortortarneranni Neqerooruteqartitsinermi Maalaaruteqartarfiup piumasaqaateqartoqarneratigut naammagittaalliuutip suliarinissaa atuuttussaatisinnaavaa.

Imm. 2. Maalaaruteqartarfiup naammagittaalliuutip suliarineqarnissaa taamaallaat atuuttussaatisinnaavaa:

- 1) naammagittaalliuuteqartup suliami taperserneqarnissani ilimagippagu,
- 2) naammagittaalliuuteqartoq naammagittaalliumminik atuuttussaatisinnaannginnera pissutigalugu soqutigisaminik allatut isumaginninnissamut periarfissaqanngippat, aamma
- 3) neqerooruteqartup neqeroorummi naammassineqarnissaanik soqutiginninnerata aamma naammagittaalliuuteqartup suliap atuuttussaatinneqarnissaanik soqutiginninnerata suliasap kinguartinneqarneranik kinguneqarnerata imminnut naapertuutsissinnaanerannik nalilersuilluartoqarsimappat.

§ 13. Naammagittaalliuuteqarfigineqartup suliariumannittussarsiuussisarnermut inatsimmi malittarisassat unioqqutissimappagit Pisortat Pisiortortarneranni Neqerooruteqartitsinermi Maalaaruteqartarfiup:

- 1) Naammagittaalliuuteqarfigineqartup neqerooruteqarnerminut atatillugu neqeroornermini suleriaasia imaluunniit aalajangigai tunuartissinnaavai.
- 2) Naammagittaalliuuteqarfigineqartup unioqqutitsilluni aalajangigai imaluunniit neqeroorutai atorunnaarsissinnaavai.
- 3) Neqerooruteqarnermut atatillugu neqerooruteqarnermi suleriaaseq imaluunniit aalajangiinerit inerteqqutaajunnaarnissaat peqqussutigisinnaavaa.

§ 14. Naammagittaalliuuteqartup piunasaqarneratigut Pisortat Pisiortortarneranni Neqerooruteqartitsinermi Maalaaruteqartarfiup naammagittaalliuuteqarfigineqartoq peqqusinnaavaa suliariumannittussarsiuussisarnermut inatsimmik imaluunniit neqeroortitsisarnermut inatsimmik unioqqutitsisimanerup malitsigisaanik naammagittaalliuuteqartup annaasaanut taarseeqqullugu.

§ 15. Akileeqqusisoqarsinnaavoq inunnut:

1) Piaaraluni mianersuaalliorujussuarluniluunniit eqqunngitsumik imaluunniit salloqittaalluni maalaaruteqartarfimmuut paasissutissiisunut, tak. § 6.

2) Maalaaruteqartarfiup inerteqqutaanik imaluunniit peqqussutaanik malinninngitsunut, tak. §§ 12-13.

Imm. 2. Inatsisartut inatsisaanni imaluunniit peqqussutini Inatsisartut inatsisaat naapertorlugu peqqusissutigineqartuni akileeqqusissuteqarnissamik aalajangersaanissaq inatsimmi tungavissaqartillugu, akileeqqusissuteqarneq Kalaallit Nunaanni pinerluttulerinermut inatsisit malillugit inummut pisinnaatitaasumut pisussaataasumullu pisussaaffiliunneqarsinnaavoq.

Imm. 3. Akileeqqusissutit, imm. 1 aamma 2 naapertorlugit pisussaaffiliunneqartut, Nunap karsianut tutsinneqassapput.

Eqqartuussivinnut il. il. suliassanngortitsineq

§ 16. Pisortat Pisiortortarneranni Neqerooruteqartitsinermi Maalaaruteqartarfiup aalajangiiffigisaa illuatungerinnut nalunaarutigineqareernerata kingorna kingusinnerpaamik sapaatit akunneri arfineq pingasut qaangiunneranni eqqartuussivinnut suliassanngortinneqarsinnaavoq. Piffissaliussaqaq tamanna nallertinnagu suliassanngortitsisoqanngippat aalajangiineq inaarutaasumik aalajangiinerussaqaq.

Imm. 2. Maalaaruteqartarfiup aalajangiinera allaffissornikkut oqartussamut allamut suliassanngortinneqarsinnaanngilaq.

Atuutilerpera il.il.

§ 17. Inatsisartut inatsisaat 1. juli 2019 atuutilerpoq.

Imm. 2. Inatsisartut inatsisaat neqeroortitsinernut 1. juli 2019 kingusinnerusumiluunniit pilersuisumut isumaqatigiissuteqarfigineqartunut atuuppoq.

Namminersorlutik Oqartussat, ulloq 12. juni 2019

Kim Kielsen